

DIT UN DAT

Kinnerkinner

Kippkappkögel-Demo

Blot dat trankiele Ingriepen van en Hunnertskupp van de Ossenbrügger Schandarms is to verdanken, dat en neet anmelde un genehmigde Demonstration in Saltbergen in sowat en halve Stünn uplöst worden kunn. Bi de Demonstranten wurren Stück of wat Slagstocken un Pyrotechnik seker stellt.

So as de Polizei mitdeelt, hebben rugweg fieftig Unerjährike in dat Oller tüsken drie un sess Jahren an de Kundgeven deelnohmen. Ogentügen berichten, dat se luudstark Spröken as „Sankt Martin, Sankt Martin“ un „Rabimmel, rabammel, rabumm, bumm, bumm!“ repen un daarbi Slagstocken drogen, an de vöörn Brandsatzen fastmaakt wassen.

Of sük dat bi de Demonstranten, de sük as Besöker van de Kinnergaarn „St. Augustinus“ utgafften, um Ledan van en Extremisten-Koppel hannelt, word van de Schandarms noch unnersöcht. Dat tweeunveertig-jährige Frominsk, de bi de Demonstration mitleep, wurr fastnohmen un sitt nu

achter dicke Dören. En Keerl up en Peerd, de all Anschien na van dat Wark dat



Hans-Hermann
Briele

Leid harr, gaff dat Deer de Sporen un verswunn tüsken de Husen. De Polizei leet ok weten, dat Kekse un Kookjes, de dat Volk bi sük harr, in Beslag nohmen wurr un nu up Drogen unnersöcht worden sallen.

Sowat teihn Schandarms wassen van de obsternaatske Kinner krabbt of tegen de Scheen paast worden. Tegen disse Lüü harren se Straaafanzeigen upsett van wegen Sehrdoon van Beamten. Söventeihn Schandarms wurren krankschreven.

Opa word tachtig

De hele Familie is bi Opa kommen. Opa word tachtig. Se brengen moje Geschenken.

Wat för de Tuun. Opa is doch so geern an 't Tuuntjen. Un Warktüüg för de Warkstee in de Schüür. Un wat so en olle Mann bruken kann. Ok Raseerschuum un Raseerwater. De Kinner mutten wat vördragen. Se hebben lütje Riemels utwennig leert. De sallen se vör Opa upseggen.

Lütje Geerd hett ok wat butenkopps leert. As he nu vör Opa steiht, rund um sük

to Vader un Moder, Unkels un Tanten un de annere Kinner, daar fallt hum de Riemel partuu neet in. He kriggt en rode Kopp un is naar benaut. Dat duurt Opa, un he sett de lütje Knevel up sien Schoot.

He seggt: „Wenn du de Spröök vergeten hest, denn segg doch enfack en Riemsel ut dien Derenbook up!“

Dat is en gode Hülp. Un Geerd seggt: „Du olle Swien, Du deist mi leed, Du leevst blot noch en körte Tied!“

Hans-Hermann Briele